



# mjesečni Bilten

omladinska mreža bosne i hercegovine

juli  
srpanj  
2017.

218

## Dragi prijatelji/ce,

Predstavljamo vam julsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **181** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u julu 2017. ....	2
Planovi za avgust 2017. ....	4
Aktivnosti članova mreže.....	5
Saopštenja/informacije/donatori/pozivi.....	14

Uživajte u čitanju!

# AKTIVNOSTI ORC/HCA U JULU 2017.

Tokom jula zaposleni i članovi Omladinskog resursnog centra Tuzla iskoristili su ljetno zatišje kako bi otišli na zaslužene godišnje odmore, te prikupili snage i energiju za nastavak svih naših aktivnosti. Zbog toga je i kancelarija ORC-a bila zatvorena i nismo imali aktivnosti.



## Održan radni sastanak Organizacionog odbora projekta Kīmiyya



U periodu od 13. do 15. jula u Napulju, Italija održan je radni sastanak Organizacijskog odbora međunarodne ALF Aktivnosti "Kīmiyya". "Kīmiyya" je međumrežna aktivnost 7 nacionalnih mreža ALF Fondacije, čiji je cilj organizovanje međunarodne konferencije pod nazivom "Uloga žene kao kao faktora za dijalog u Euromediterranskom društvu. Radni sastanak organizacionog odbora okupio je 11 lidera ALF mreža, koji su na trodnevnom sastanku definisali agendu, ciljeve, učesnike i sve ostale tehničke pojedinosti konferencije. Konferencija će se održati u Napulju, Italija, od 11. Do 15. Septembra ove godine.

Na konferenciji će učestvovati 84 člana iz 42 ALF mreže, deset međunarodnih eksperata, predstavnici ALF mreže Italije, te predstavnici međunarodnih institucija. Konferencija će pokušati istražiti mogućnosti reafirmacije uloge žene kao glavnog aktera za dijalog i mir.

Nosilac ove aktivnosti je italijanska organizacija **Fondazione Mediterraneo**, u saradnji sa nacionalnim mrežama Albanije, Alžira, Bosne i Hercegovine, Francuske, Italije, Malte i Tunisa.

Predstavnik Organizacionog odbora iz Bosne i Hercegovine bio je Miralem Tursinović.

Osim ove aktivnosti, u narednom periodu, u okviru projekta "3S za međukulturalnu građansku edukaciju, biće održana tri seminara, i to: Tangier, Maroko (2. – 8. Avgust), Mazara del Vallo, Italija (17. – 23. Avgust) i Bursa, Turska (7. – 15. Septembar). Na ovim seminarima će učestvovati 10 predstavnika ALF mreže BIH. Više o ovim aktivnostima u narednom periodu.

# Omladinska grupa ORC Tuzla

## „Zamisli 2030“

Omladinski pokret "Revolt" je, u suradnji sa Ujedinjenim nacijama u Bosni i Hercegovini, i uz podršku Volontera Ujedinjenih nacija 3. Jula upriličio radionicu na temu "Zamisli 2030". Na radionici u Tuzli su učestvovali zainteresirani srednjoškolci, studenti, te aktivisti nevladinih organizacija. Nakon kratkog teorijskog uvoda i upoznavanja sa ciljevima održivog razvoja, učesnici su u grupama radili na odabranom problemu tražeći rješenja. U potrazi za rješenjem korišten je inovativni alat koji je učesnicima bio veoma interesantan i učinkovit. Amila Selimbašić i Ivana Jokić su radile na rješavanju problema pristupačnosti energije iz čistih izvora, sa aspektom poboljšanja međunarodne saradnje. Ostale grupe su se bavile kvalitetnim obrazovanjem te zdravljem i blagostanjem.



## Sastanak u Gradskoj Upravi povodom objavljivanja Javnog poziva za projekte Omladinskih udruženja u Tuzli



U Gradskoj Upravi Tuzle (6.7.) održan je konsultativni sastanak sa predstavnicima registriranih omladinskih udruženja, koja čine Vijeće mladih Grada Tuzla, povodom objavljivanja Javnog poziva za projekte u iznosu od 23.000 KM. Nedavno je osmišljen nacrt Strategije za mlade, koja je dostavljena svim udruženjima, kako bi u roku od mjesec dana javne rasprave dali svoje mišljenje o istoj, koja će dalje biti iznesena i odobrena na Gradskom Vijeću. Uz Strategiju, dostavljen je i Pravilnik o

raspodjeli sredstava za omladinske projekte, kako bi ga udruženja mogla korigirati prije konačnog objavljivanja Javnog poziva u Septembru. Predstavnice gradske uprave su izrazile želju za poboljšanjem suradnje sa mladima pa je dogovoreno da će se u narednom periodu organizirati posjete svakom od udruženja, te da će mladi moći po želji prisustvovati sjednicama Vijeća. Na sastanku je u ime ORC Tuzla prisustvovala Ivana Jokić.

## FOA (Festival omladinskog aktivizma)

U periodu od 27 do 30. Jula održan je kamp "FOA 2017" (Festival omladinskog aktivizma), na kojem su se učesnici pozabavili pitanjima socijalnog poduzetništva. Kamp je održan u Ključu (BiH), a na njemu su učestvovali mladi iz Brčkog, Sarajeva, Goražda, Modriče, Bihaća, Sanskog Mosta, Velike Kladuše, Cazina, Bugojna, Ključa i Tuzle. Učesnici su kroz radionice pokušali da se približe pojmu "socijalno poduzetništvo", te su u grupama sami pravili imaginarne firme te se "probijali na tržište", stičući vještinu pregovaranja.



29. jula kao gost Festivala bio je Nermin Kasupović, osnivač i direktor NDM Agency, koji je svoje iskustvo podijelio sa učesnicima i pokušao objasniti kako se stvara brend na tržištu.

Festival omladinskog aktivizma se završio tako što su učesnici pravili razglednice kao poruku vlasti koje će istima biti proslijeđene.

## REDOVNE AKTIVNOSTI ORC I HCA TUZLA

Tokom jula radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

## PLANOVI HCA/ORC-A ZA AVGUST 2017.

- Sprovođenje redovnih aktivnosti kroz Omladinsku mrežu Bosne i Hercegovine;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Nastavak rada na namicanju sredstava za 2017. godinu.

# AKTIVNOSTI ČLANICA OMLADINSKE MREŽE BiH



Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: [kult@mladi.org](mailto:kult@mladi.org)

Tel.: +387 33 778 778; Fax: +387 33 778 779

Web: [www.mladi.org](http://www.mladi.org)

## Novi zahtjevi privrednika: Pomjeranje roka za plaćanje PDV-a i smanjenje dnevne zatezne kamatne stope?!

Izjašnjavanje o pomjeranju roka za plaćanje PDV-a i smanjenju dnevne zatezne kamatne stope zatraženo je od Upravnog odbora Uprave za indirektno oporezivanje i Vijeća ministara Bosne i Hercegovine kroz poslaničko pitanje koje je uputio poslanik u Predstavničkom domu Parlamentarne skupštine BiH, Saša Magazinović.



Ova inicijativa pokrenuta je nakon što se Uprava negativno očitovala o pitanju izmjena Zakona o PDV-u u dijelu koji se odnosi na načine plaćanja PDV-a.

Prvobitno se inicijativom tražilo uvođenje plaćanja PDV-a po naplaćenim umjesto izdatim računima, a nakon što je Uprava odgovorila da za to trenutno nema dovoljno administrativno-tehničkih kapaciteta, te da su potrebna dodatna zapošljavanja osoblja, Institut za razvoj mladih KULT pokrenuo je inicijativu da se rok za plaćanje PDV-a pomjeri sa 10. na posljednji dan u mjesecu, ali i smanjenje dnevne zatezne kamate za kašnjenje u plaćanju PDV-a sa 0,04% na 0,02%. Inicijativu je, kao i ranije, u poslaničke klupe prenio poslanik Saša Magazinović.

Više od 30.000 privrednika koji traže izmjene Zakona ističu da se kreditno zadužuju kako bi platili PDV na vrijeme, ali i da je dnevna zatezna kamatna stopa toliko visoka da im se više isplati podići kredit u banci i platiti PDV državi, nego kasniti sa plaćanjem PDV-a državi, jer je kamatna stopa na bankovni dug niža.

Za dvije tražene izmjene u PDV sistemu, nije potrebno dodatno vrijeme, osoblje, niti drugi resursi.

Privrednicima se mora pomoći i na privrednom razvoju se mora intenzivnije raditi. Svako izbjegavanje intenzivnijeg angažmana za rješavanje nagomilanih problema u privredi, a naročito kada govorimo o malim privrednicima je neprihvatljivo i nije ni čudo da privrednici već sada pitaju šta bi se desilo da oni bojkotuju plaćati PDV na samo dva mjeseca.

Šta bi se zaista desilo trebaju se zapitati i svi koji mogu doprinijeti poboljšanju situacije u privredi jer su i mnoge europske zemlje, i to mnogo razvijenije od BiH, u slučaju roka za plaćanje PDV-a manje stroge nego što je to slučaj u BiH. Pa je tako rok za plaćanje za one privrednike koji nisu u sistemu plaćanja PDV-a po naplaćenim računima, duži. Na primjer, do 15. u mjesecu za prethodni mjesec u Austriji i Srbiji, do

20. u Belgiji, Hrvatskoj i Mađarskoj, do 25. u Poljskoj i Rumuniji, do zadnjeg dana u mjesecu u Sloveniji i Grčkoj itd. Poreski period za koji se PDV obračunava i plaća u nekim je zemljama i duži od mjesec dana, pa je tako privrednicima dodatno olakšano jer je i sam rok za plaćanje PDV-a duži.

Institut za razvoj mladih KULT će i dalje zajednički sa privrednicima insistirati na uvođenju plaćanja PDV-a po naplaćenim umjesto izdatim računima za malu privredu, ali i izmjeni roka, te smanjenu zatezne kamate kao prvog koraka u procesu. Institut je voljan surađivati i sa Upravom i svim drugim nadležnim institucijama kako bi se napravile izmjene koje su neophodne za razvoj privrede i stvaranje novih radnih mjesta u zemlji u kojoj imamo više od pola miliona nezaposlenih, u kojoj se preduzeća svakodnevno zatvaraju i u kojoj ne postoji želja već strah od pokretanja vlastitog biznisa.

## Forum mladih zemalja Zapadnog Balkana i EU: Mlade treba potaknuti da ne napuštaju svoje zemlje

Predstavnica Instituta za razvoj mladih KULT bila je učesnica dvodnevnog foruma mladih zemalja Zapadnog Balkana i EU „Povezivanje mladih – put naprijed” koji je održan u Trstu paralelno sa skupom premijera zemalja Zapadnog Balkana, odnosno Samitom Zapadnog Balkana u okviru inicijative Berlinski proces.

Tokom foruma kroz četiri radne grupe govorilo se o mobilnosti i razmjeni, inkluziji i prevazilaženju stereotipa, preduzetništvu i učešću mladih.



„Mlade ljude treba potaknuti da ne napuštaju svoje zemlje tako što će im se dati mogućnost da učestvuju u odlučivanju zajedno sa vlastima, na način da budu saveznici, a ne protivnici.“ – poručio je prilikom svog obraćanja Luis Alvarado Martinez, predsjednik Europskog foruma mladih.

Predstavnica Instituta za razvoj mladih KULT bila je jedna od učesnica foruma i sa članovima delegacije iz Bosne i Hercegovine dio je radne grupe na temu preduzetništva.

Kako je zaključeno, važno je nastaviti proces promocije i integrisanja poduzetničkog učenja kao ključne kompetencije u sve dijelove obrazovnog sistema, te omogućiti jačanje kapaciteta svih onih koji su uključeni u ove procese. Istaknuto je i da su potrebni raznovrsniji načini finansijske i stručne podrške za biznise koje mladi tek pokreću, da takvi programi vlada trebaju biti kontinuirani i da je važno mjeriti njihove rezultate kako bi svaki novi program učio na greškama prethodnog.

Zaključci sve četiri radne grupe, upućeni su i premijerima zemalja Zapadnog Balkana. Forum je treći u nizu ciklusa foruma mladih koji je započeo prošle godine u Parizu, a rezultirao otvaranjem Regionalne kancelarije za saradnju mladih.

Na osnovu rezultata foruma mladih Regionalna kancelarija za saradnju mladih dalje će razvijati svoj program rada kako bi podsticao saradnju mladih u regiji.

Forum mladih zemalja Zapadnog Balkana i EU održava se na Univerzitetu u Trstu, a organizuje ga Europska komisija u partnerstvu sa Italijanskom vladom, Europskim forumom mladih i SALTO omladinskom mrežom.



## Omladinski klub "DIJAMANT"

Ul. Bučići 42, 70101 Jajce

Tel./fax: +387 30 279 444, 61 179 209, 63 366 811

E-mail: [m.sekib@bih.net.ba](mailto:m.sekib@bih.net.ba)

WEB: [www.ocd-dijamant.net](http://www.ocd-dijamant.net), [www.dijamantmoda.com](http://www.dijamantmoda.com)

## Počnje terapijski projekt 'Inicijativa Siglinde' u Jajcu



O.K. "Etno dijamant" Bučići, u suradnji s međunarodnom humanitarnom organizacijom "Inicijativa Siglinde" iz Njemačke realizuje projekt štrikanja, pletenja i šivanja u Bosni i Hercegovini, a zbog smanjenja trauma koji su žene doživjele u toku rata.

Cilj je doći do boljeg i kvalitetnijeg života kroz druženje, krojenje i šivenje. Projekat ima terapijsko težište. Žene i djevojke kroz zajedničko šivenje doživljavaju da nešto nauče, znaju, da mogu nešto vrijedno stvarati, pa na taj način dobijaju na

samopouzdanju, te snagu za život.

Osim toga privređuju finansijska sredstva prodajom predmeta koje izrade.

Dakle, pozivamo žene i djevojke koje imaju volje i vremena da se uključe u program druženja, a koje poznaju rad na krojenju i šivenju. Također, pozivamo i druge zainteresirane koje imaju volju i vrijeme sa završenom tekstilnom školom. Druženje i šivenje će se održavati na dnevnoj bazi u vremenu, a najmanje kontinuirano četiri sata.

Nismo još utvrdili koliko će puta sedmično biti organizirano druženje i šivenje, a to će biti utvrđeno u zavisnosti od interesa onih koji se prijave i prihvate uslove koje Inicijativni odbor donese.

Ovim putem Vas ohrabrujemo da se prijavite i pratite naše "Izvorne" informacije !

Želimo da Vas ohrabrimo da mi kroz pomenute aktivnosti stvaramo uslove da u narednom periodu počnemo i zapošljavati.

Sve aktivnosti će se odvijati u prostorijama O.K. "Etno dijamant" Bučići.

Ako imate dodatnih pitanja i nejasnoća, možete se javiti preko maila ili mobitel

[m.sekib@bih.net.ba](mailto:m.sekib@bih.net.ba)

061/179-209,


stoji u saopćenju O.K. "Etno dijamant" Bučići.

## Poziv

Omladinski klub "Dijamant" iz Jajca poziva mlade iz našeg grada na učešće u projektu "Sport je najbolja komunikacija", koji će se kroz niz aktivnosti realizirati u naredna tri mjeseca u četiri općine.

Nažalost, mladi ljudi znaju vrlo malo o svojim vršnjacima iz drugih zajednica, kao i u podijeljenim zajednicama. S obzirom na bolna iskustva iz rata, čije posljedice se vide u podijeljenom društvu, od iznimne je važnosti da se stvore uvjeti da mladi ljudi mogu komunicirati, družiti se jedni s drugima i naučiti više o promicanju interakcije, razvoja tolerancije te pomirenja.

Naš cilj je doprinijeti izgradnji mira i jačanja interakcije među mladima, jačanje tolerancije, razumijevanja, upoznavanja i međusobnog dijaloga različitih nacionalno-etničkih skupina.



U ovu svrhu, organizovat ćemo niz aktivnosti:

**Edukativne radionice u Jajcu, na teme:**

1. Razbijanje predrasuda i stereotipa
2. Izgradnja povjerenja i promocija interakcije, razvoj tolerancije i izgradnja budućih odnosa, te promocija ljepote različitosti.

**Sportske događaje u: Šipovu, Tomislavgradu, Donjem Vakufu i Srbcu**

**Volonterske akcije, posjeta starijim i usamljenim licima u zajednici**

**Zajednička posjeta za sve učesnike, Banja Luka**

**“Ovaj projekat je omogućila velikodušna podrška američkog naroda putem Američke ambasade u Sarajevu i svi stavovi, mišljenja i zaključci izneseni ovdje ne odražavaju nužno stav Američke ambasade ili Vlade SAD, već isključivo autora”**





## H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Dobož

Tel./fax: +387 53 226 886

E-mail: merhamet.doboj@cutuk.net

FB: [www.facebook.com/Merhamet-Doboj](http://www.facebook.com/Merhamet-Doboj)

Obimne su aktivnosti H.O. „Merhamet-a” Dobož u 2017 god.

Osim svakodnevnih aktivnosti H.O. “Merhameta” koje podrazumjevaju: evidentiranje članarine, štampanje korisnicima molbi, žalbi, raznih dopisa, fotokopiranje, pregled informacija za sastanke i drugih aktivnosti, tokom jula uradili smo sljedeće:

### Seminar „Ciljevi održivog razvoja

Aktiviskinja Merhameta Sabrina Ibrahimović prisustvovala je seminaru koji je održan na temu “Ciljevi održivoga razvoja” u prostorijama organizacije “Topeer” 05.07.2017. godine. Seminar su održali predstavnici UNHCR u BiH.



Prvi cilj seminara podrazumijeva okončanje siromaštva svuda u svim oblicima. Primijeniti odgovarajuće nacionalne sisteme socijalne zaštite i mjere za sve, uključujući najugroženije, i do kraja 2030 obuhvatiti značajan broj siromašnih i ranjivih. Kreirati jasne okvire politika na nacionalnom, regionalnom i međunarodnom nivou, zasnovane na raznim strategijama koje promovišu borbu protiv siromaštva i rodnu osjetljivost, kako bi se podržalo ubrzano investiranje u akciji na iskorijenjivanju siromaštva. Pojačati prevenciju zloupotrebe opojnih supstanci i liječenje posljedica takve zloupotrebe, što obuhvata i zloupotrebu opojnih droga i štetnu upotrebu alkohola. Podržati istraživanje i razvoj vakcina i lijekova na zarazne i nezarazne bolesti, koje primarno pogađaju zemlje u razvoju. Osigurati da svi učenici steknu znanja i vještine potrebne da se unaprijedi održivi razvoj, između ostaloga i putem edukacije za održivi razvoj i održive stilove života, ljudska prava, rodnu ravnopravnost, kao i za promovisanje kulture mira i nenasilja. Poslije prezentovanja ideje prisutni su mogli da prezentuju svoje ideje, mišljenje itd. Svoj doprinos u izlaganju predstavnika UNHCR dali su i aktivisti H.O. Merhamet, kao i drugih nevladinih organizacija.

### Fokus grupa u okviru fondacije „Fami”



7. jula je u Domu zdravlja Doboj održan sastanak Fokus grupe, a po zajedničkom projektu fondacije "Fami": "Podrška pacijentima koji boluju od neizlječive bolesti u opštini Doboj". Ovaj humani projekat će se implementirati u saradnji sa NVO sektorom, udruženjima, domom zdravlja i drugim organizacijama. Svoj doprinos sastanku dali su i aktivisti merhameta Doboj.

## Koalicija „Tolerantno i pozitivno“

13. jula je u prostorijama Opštine Doboj održan sastanak koalicije Tolerantno i pozitivno iz Doboja. Na sastanku je prezentovan plan za kohezivnu zajednicu – Doboj. Tokom sastanka, predstavnik OSCE-a Siniša Petrović je veoma iscrpno i realno prikazao dosadašnje aktivnosti i plan za buduće.



## Posjeta Sarajevu



Dana 27.07.2017. godine aktivisti "Merhameta" Doboj su putovali u Sarajevo, gdje je programom "Međunarodnoga vjeća" u saradnji sa OSCE-OM Banja luka planirana posjeta vjerskih objektima, gdje su bili prisutni većinom mladi.

Veoma interesantna je bila posjeta zemaljskom muzeju u Sarajevu, gdje se zaista imalo šta vidjeti. Druženje je bilo veoma interesantno. Predstavnica OSCE-a je pomno pratila i nadgledala sve prisutne uz sva pitanja davala odgovore. Bilo je nezaboravno.

28.jula je održan sastanak Regionalnog odbora "Merhameta" Banja luka u Dubici, na kome su sumirani rezultati rada za protekla tri mjeseca.



**OMLADINSKA ORGANIZACIJA "SVITAC"**

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: [svitac@gmail.net](mailto:svitac@gmail.net)Web: [www.svitac.org](http://www.svitac.org)FB: [www.facebook.com/omladinska.svitac](https://www.facebook.com/omladinska.svitac)

## Dnevne radionice



Omladinska organizacija Svitac je u julu nastavila sa svakodnevnom aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinatorica jutarnjih radionica je za juli pripremila plan aktivnosti za neformalno učenje kroz igru, maštovitost i kreativnost. U toku mjeseca za uzrast 4-7 godina su se organizovale kreativne radionice, gdje su učesnici pravili papirne kornjače, slonove i satove. Kako se svaki mjesec prijave novi članovi, koordinatorica je pripremila kroz igru učenje alfabeta. Na muzičkim radionicama se radi nova pjesmica "Šuma blista šuma pjeva" te su mališani imali priku da se upoznaju sa mikrofonom, te muzičkim instrumentima gitarom i trubom. Jedan dan u sedmici je planiran za zajedničko gledanje crtanih filmova i takmičarske igre. Materijali

koji su se koristili za realizaciju ovih radionica su ljepilo, žica, kolaž papir, blokovi za crtanje, voštane boje, flomasteri, drvene i vodene bojice, kamenje, listovi, grane. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U julu je do 20 učesnika pohađalo jutarnje dnevne radionice.

Poslepodnevna grupa (8+) je u julu radila na dekorativnim temama koje su bile prilagođene njihovom uzrastu. Uz pomoć lokalnih i međunarodnih volontera nastavili su raditi na mini projektima "Moja kuća iz snova". Održane su radionice kreativnog izražavanja, engleskog i njemačkog jezika, gdje su učesnici vježbali sinonime, komunikaciju, izgovor, te razne igre koje pospješuju učenje stranog jezika u grupi. Učesnici su imali mogućnost da se okušaju u društvenim i sportskim igrama i timskom radu, razvijajući osjećaj za poštovanje drugog, socijalizaciju i fer igru. Grupa je, pored gramatičkih zadataka, vježbala komunikaciju na engleskom jeziku. Srijeda je dan za ples, muziku i pjevanje. Svakog četvrtka starija grupa je podijeljena u dvije manje i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom su radionice njemačkog jezika kao i dan za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u julu je bila Milica Baćanov uz asistenciju lokalnih i Weltwaerts i EVS međunarodnih volontera Alexandra Likica iz Njemačke, Hüseyina Şeref Çalışa i Merve Güçlü iz Turske, Davida De Ruweea i Andree Diaz is SAD-a,

te Bena Owensa iz Velike Britanije. Broj učesnika starije grupe je trenutno između 15 i 20 učesnika.




## „Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova. Ovaj mjesec je grupa radila na komunikaciji i temama svakodnevnice (različiti žanrovi knjiga i muzike). Grupa je takođe radila vježbanje slušanja, te pisanje i čitanje. Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. Koordinator projekta je međunarodni volonter iz Njemačke Alexander Likic.

## „I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Ovaj mjesec je koordinator radionica više pažnje posvetio usmenoj komunikaciji, i temama kao što su različiti talk-shows. Koordinator projekta je međunarodni volonter iz Velike Britanije Ben Owens.



## „Učimo Turski“ – radionice komunikacije na turskom jeziku sa izvornim govornicima

Radionice turskog jezika se održavaju utorkom u prostorijama Omladinskog centra Brčko distrikt od 18:00-19:00 časova. Radionice komunikacije na turskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Učesnici su ovaj mjesec vježbali svakodnevne, jednostavne dijaloge. Koordinator projekta su međunarodni volonteri iz Turske Hüseyin Şeref Çaliş i Merve Güçlü.

## Dramske radionice

Projekat „Dramske radionice“ za mlade ljude se održava svakog utorka u prostorijama Omladinskog centra Brčko distrikt od 20:00-21:30 časova, a koordinator projekta je lokalna volonterka Azra Pezerović. Grupa trenutno vježba na scenama iz komedije „Bitange i princeze“. Glavni cilj ovog projekta je da mladi ljudi, koji vole pozorište i glumu, usvoje nove vještine, te da steknu nova iskustva i poznanstva. Prije čitanja tekstova, grupa radi vježbe zagrijavanja u trajanju od 10 do 20 minuta. Ove vježbe su od velike pomoći za opuštanje prije aktuelne realizacije radionice.

## „Freeletics“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator vježbi za kondiciju i motoriku je međunarodni volonter iz Njemačke Alexander Likic.

## Radionice gitare

Učesnici radionice gitare su nastavili sa redovnim radom uvježbavajući etide i kompozicije (Rolanda Dyens, Matteo Carcassi, Francisco Tarrega, M.M Ponce, Thyerri Tisserand) skale i duete (J.S Bach, Sergio Assad)

## Radionice sambe

Učesnici ove radionice uvježbavali su novu kompoziciju „Waltz“. Kompozicija je u tro-četvrtinskom taktu i time predstavlja izazov za učesnike, uzimajući u obzir da su do sada većinom radili na kompozicijama u četveročetvrtinskom taktu.

Za avgust se planira nastavak svih redovnih radionica Omladinske organizacije Svitac.



# SAOPŠTENJA/INFORMACIJE/DONATORI/POZIVI

## Grantovi Prevent grupacije



Korporativna politika Prevent grupacije obuhvata princip prema kome svaka uspješna kompanija treba da učestvuje u razvoju društva, društvene okoline i svojim radom promoviše kolektivno dobro zajednice. Uzimajući u obzir sve navedeno Prevent posebnu pažnju poklanja razvoju lokalne zajednice i mladih u njoj. Afirmišemo mlade i talentovane ambasadore

Bosne i Hercegovine te im pomaže na putu ka ostvarenju snova. Kroz podršku Fondaciji Hastor, Prevent stipendira preko 1393 osnovaca, srednjoškolaca i studenata ugroženih kategorija.

Kroz politiku društveno odgovornog poslovanja Prevent posebnu pažnju poklanja njegovanju odnosa s lokalnom zajednicom te izgradnji zajedničke vrijednosti kao osnove za razvoj kompletnog društva. U okviru njegovanja navedenih odnosa, Prevent grupacija je višegodišnji sponzor raznih kulturnih manifestacija, sportskih klubova i drugih aktivnosti od šireg društvenog značaja.

[Ovdje](#) preuzmite formular za donacije i sponzorstva.

Više informacija: <http://prevent.ba/bs/drustvena-odgovornost>

## Javni poziv za dodjelu malih bespovratnih sredstava “Zaštita slobode medija i slobode izražavanja na Zapadnom Balkanu”



Poziv je otvoren do 31. avgusta 2017.

Udruženje BH novinari u saradnji s partnerskim organizacijama iz regije [poziva](#) organizacije **civilnog društva iz Bosne i Hercegovine, Makedonije, Kosova, Crne Gore i Srbije** koje se bave zaštitom ljudskih prava da se u **partnerstvu s novinarima**, njihovim udruženjima, sindikatima, mrežama i medijskim organizacijama **prijave za finansijsku podršku putem programa za dodjelu malih bespovratnih sredstava**

“Zaštita medijskih sloboda i slobode izražavanja na Zapadnom Balkanu”. Konkurs ima **dva prioriteta**: (1) podrška projektima koji se bave problemima i preprekama na koje nailaze **novinari** izloženi različitim vrstama pritisaka te (2) podrška projektima koji se usredotočuju na pritiske kojima su izloženi **aktivisti za ljudska prava** u pogledu slobode izražavanja.

Ukupna vrijednost programa malih grantova je 267 000 EUR. Program je organiziran u dvije cjeline (1) podrška za **regionalne projekte u visini 30 000 – 40 000 EUR** po projektu (2) podrška za **nacionalne projekte u visini 5000 – 1000 EUR** po projektu. Ovisno o kvaliteti prijave, planira se dodjela **15 grantova** (5 većih regionalnih i 5 manjih za nacionalne projekte).

Konkurs je **otvoren od 25. 7. do 31. 8. 2017.** kada u ponoć ističe rok za prijave. **Konkursna dokumentacija** – smjernice za aplikante, prijavni obrazac te prijavni obrazac budžeta nalaze se na web stranici projekta <http://safejournalists.net>. Radni jezik konkursa je **engleski**, što podrazumijeva da su konkursna dokumentacija, komunikacija s aplikantima i projektne prijave na engleskom jeziku.

Ovaj konkurs provodi **Hrvatsko novinarsko društvo (HND)** u sklopu šireg projekta “Regionalna platforma zapadnog Balkana za zagovaranje medijskih sloboda i sigurnosti novinara” zajedno sa **partnerskim novinarskim** udruženjima iz Srbije (NUNS), BiH (BHN), Crne Gore (SMCG), Kosova (AGK) i Makedonije (ZNM), uz finansijsku podršku Europske komisije (IPA) te sufinansiranjem Ureda za udruge Vlade RH.

**Pitanja o uslovima natječaja** mogu se postaviti u razdoblju od **25. 7. do 10. 8. 2017.** na email adresu [mediafreedom.smallgrants@solidarna.hr](mailto:mediafreedom.smallgrants@solidarna.hr) na koju se šalju i projektne prijave. Rezultati konkursa bit će objavljeni 20. rujna/septembra na na web stranici projekta <http://safejournalists.net> gdje će 20.8.2017. biti objavljeni i svi odgovori na postavljena pitanja o natječajnom postupku. Tehničku pomoć u provedbi natječaja pruža Zaklada SOLIDARNA.

## Poziv za dostavu prijave za sredstva za Međunarodnu pomoć iz Fonda za svjetsku baštinu za 2018. Godinu



Otvoren je poziv za dostavu prijave za sredstva za Međunarodnu pomoć (International Assistance) iz Fonda za svjetsku baštinu (World Heritage Fund) za 2018. godinu.

Sredstva iz Fonda za svjetsku baštinu su namijenjena projektima koji se odnose na dobra svjetske baštine locirana na teritoriji zemlje koja aplicira ili dobrima koja se nalaze na Tentativnoj listi te zemlje.

Dodatne informacije o procesu apliciranja, o tome ko može da aplicira za sredstva iz ovog Fonda kao i

vrsti aktivnosti sa kojima se može aplicirati možete naći [ovdje](#).

Aplikacioni obrazac možete preuzeti [ovdje](#), a uputstvo za pripremu aplikacije [ovdje](#).

Aplikacioni obrazac popunjen na engleskom, uz prevod na jedan od službenih bh jezika je potrebno dostaviti **najkasnije do 15.9.2017. godine**, u štampanoj formi i u elektronskoj formi (na CD-u) na adresu:

Ministarstvo civilnih poslova BiH

Državna komisija BiH za UNESCO

Trg BiH 1

71000 Sarajevo

sa naznakom “Prijava za UNESCO International Assistance 2017”

**Nepotpune i neuredne prijave koje nisu u skladu sa kriterijima UNESCO-a, kao i prijave koje pristignu nakon naznačenog roka, neće biti uzete u razmatranje.**

Izvor: <http://www.unescobih.mcp.gov.ba/konkursi/?id=14869>

## Uči, misli i djeluj! Čeka baš tebe! Prijavi se!

**KO?** Institut za razvoj mladih KULT u partnerstvu sa Udruženjem Nautilus i Programom za mlade SOS Dječijih sela YES Centar provodi program obuke omladinskih lidera/ki **UMiD** (Uči, misli i djeluj!), generacija 12.



**ŠTA?** Obuka UMiD ti omogućava da postaneš aktivan/a lider/ica u svojoj lokalnoj zajednici i potpomogneš u rješavanju problema mladih, upoznaš nove prijatelje, naučiš nove vještine, družiš se i usavršiš sebe.

**KAKO?** Tokom obuke održat će se deset dvodnevnih radionice na kojima ćeš naučiti mnogo o sljedećim temama:

- Kako da postaneš aktivan građanin/ka i kako da animiraš svoje vršnjake da se i oni uključe u rješavanju problema mladih u zajednici?,
  - Kako podjela uloga u timu može pomoći da budeš jači i bolji lider/ica?,
  - Kako možeš uvjeriti donosiocce odluka i druge učesnike/ce u svojoj društvenoj zajednici da daju konkretnu podršku mladim ljudima?,
  - Utječe li to što si momak ili djevojka da tvoje djelovanje u društvu bude značajnije?,
- Kako da aktivni volontiranjem pomažeš i drugima ali i gradiš sebe?,
  - Kako možeš bolje upoznati samog sebe i kako se nadograditi da budeš još bolja osoba?
    - Popuniš prijavnicu, koju možeš naći [OVDJE](#)
    - smisliš konkretnu akciju koju bi nakon obuke radio/la u svojoj zajednici,
    - budeš spreman/a tijekom i nakon obuke podržati rad Udruženja Nautilus.
    -

Tokom obuke ćeš dobiti priliku da sa vršnjacima osmisliš konkretnu akciju u cilju rješavanja postojećeg problema u lokalnoj zajednici, čiju će realizaciju savjetodavno i finansijski podržati Program za mlade SOS Dječjih sela YES Centar.

Sa tobom će biti potpisan ugovor o pohađanju obuke sa čijim sadržajem će biti upoznati i tvoji roditelji/staratelji. Svi uspješni polaznici/e će nakon obuke dobiti certifikat, a Institut će pratiti aktivistički razvoj i pružati tebi podršku i nakon obuke.

**KADA?** Radionice će se održavati najviše dva puta mjesečno, počevši od augusta 2017.g., tokom petka i subote. Prvi modul obuke je planiran 25-26.8.2017.

**GDJE?** Naša druženja bit će organizirana u YES Centru SOS Dječjih sela Sarajevo.

**TROŠKOVI?** Nemoj se brinuti za troškove. Troškove putovanja i ishrane snose organizatori programa obuke.

**PRIJAVA!** Ukoliko si zainteresiran/a za obuku, imaš između 18 i 24 godina, živiš u Kantonu Sarajevo ili Gradu Istočno Sarajevo i želio/ljela bi da učestvuješ na radionicama i budeš dio UMiD generacije 12, potrebno je da:

- Popuniš prijavnicu, koju možeš naći [OVDJE](#)
- smisliš konkretnu akciju koju bi nakon obuke radio/la u svojoj zajednici,
- budeš spreman/a tijekom i nakon obuke podržati rad Udruženja Nautilus.

Učešćem u ovoj obuci postaješ i aktivni član/ica Udruženja Nautilus.

Dodatne informacije možeš dobiti i putem telefona **033 778 762** ili na email [katarina.vuckovic@kultbih.org](mailto:katarina.vuckovic@kultbih.org). Prijaviti se možeš do **16. augusta 2017. g.**

**Uči, misli i djeluj! UMiD 12 čeka baš tebe!**

## Europa za građane: Novi rok za predaju aplikacija 1. Rujna

Drugi rok za prijavu projekta za sredstva iz EU programa 'Europa za građane' je otvoren do 1. rujna/septembra ove godine. Za sada su na stranici Izvršne agencije za obrazovanje, audiovizualnu i kulturnu djelatnost (E ACEA) objavljena obavijest samo za Town Twining i Networks of Town.

Prema uvidu u rezultate natječaja iz prvog kruga **Akta.ba** saznaje da niti jedno udruženje/grad/općina iz BiH nije prošla selekciju kao glavni aplikanti za razliku od prošle godine kada su dvije organizacije iz BiH kroz ovaj program povukle 75.000 eura sredstava za implementaciju svojih aktivnosti.

Inače, Program je namijenjen općinama, gradovima, a na njega mogu aplicirati čak i mjesne zajednice te neprofitne organizacije, udruženja...

Cilj ovog Programa EU je promocija suradnje među zemljama sudionicama Programa, u područjima vezanima za zajedničku europsku povijest i aktivno europsko građanstvo.

Programom se također nastoji osnaživati interkulturalni dijalog na europskoj razini povezivanjem građana i poticanjem suradnje neprofitnih organizacija i jedinica lokalne i regionalne samouprave među zemljama članicama Programa.

Tako da oni gradovi, udruženje i dr. koji apliciraju iz BiH moraju imati bar jednog partnera iz EU.

Zemlje sudionice Programa su 28 država članica Europske unije, zemlje pristupnice, zemlje kandidatkinje i potencijalne zemlje kandidatkinje (Srbija, Crna Gora, Bosna i Hercegovina, Albanija i Makedonija) kao i zemlje EFTA-e.

Ukupan proračun programa, za razdoblje 2014.-2020. godina, iznosi 185 milijuna eura.

Izvor: <https://www.akta.ba/bs/Vijest/eu/europa-za-gradane-novi-rok-za-predaju-aplikacija-1-rujna/80067>



### Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*

**Omladinski resursni centar  
Tuzla**

**Hadži Bakirbega Tuzlića 1  
75000 Tuzla**

**tel/fax: 035 258 077**

**e-mail: [orcuzla@bih.net.ba](mailto:orcuzla@bih.net.ba)  
[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje  
Omladinski resursni centar -  
ORC Tuzla*

*Prevod Biltena na engleski: **Stefan Cvijanović** – prof. engleskog jezika*

*WEB stranica Mreže:  
**[www.omladina-bih.net](http://www.omladina-bih.net)***

*Mejling lista Mreže:  
**[posta@omladina-bih.net](mailto:posta@omladina-bih.net)***

*Webmaster:  
**[emir.delalic@gmail.com](mailto:emir.delalic@gmail.com)***